

# **Suliffeqarfimmi piginnaanngorsaaqqinnermi akissarsianut tapiissutit, piginnaanngorsaaqqinnermut pilersaarut, piginnaanngorsaaqqinnermi ikiorsiissutit aamma eqaannerusumik suliffeqarneq pillugit Namminersornerullutik Oqartussat nalunaarutaat**

Piginnaanngorsaaqqinnissamut ikiorsiisarneq pillugu Inatsisartut peqqussutaanni nr. 4, 31. maj 2001-imeersumi § 9, imm. 2, § 12, § 14 aamma § 17 naapertorlugit aalajangersarneqarput:

## *Suliffeqarfimmi piginnaanngorsaaqqinneq*

**§ 1.** Piginnaanngorsaaqqittumik suliffeqarfimmi sungiusaanermi ilinniartitsinermilu suliffeqarfik akissarsiaqartitsissaaq, piginnaanngorsaaqqittup suliffeqarfimmi sulineranut naleqqiullugu tiiminut suliffiut naapertuuttumik.

*Imm. 2.* Akissarsianut aningaasartuutit 20%-iisa 80%-iisalu akornanni annertussuseqartut kommunip suliffeqarfimmut utertillugit akilissavai. Piginnaanngorsaaqqittup sulisinnaassusia utertillugit akiligassanik annertussusiliinermi apeqqutaavoq aalajangerneqartassallunilu sivikinnerpaamik sapaatip akunneri sisamakkaarlugit. Suliffeqarfimmi piginnaanngorsaaqqinneq aallartitsinnagu kommunip suliffeqarfiullu akornanni erseqqinnerusumik isumaqatigiissusiortoqarsimassaaq.

*Imm. 3.* Piginnaanngorsaaqqittup sulisinnaassusia nalilerneqassaaq inuup atugassarititaasut nalinginnaasut tunngavigalugit assigusumi suliffimmi atorfinitsitaasimasup sulineri pisinnaassusianut naleqqiullugu.

## *Piginnaanngorsaaqqinnermut pilersaarut*

**§ 2.** Piginnaanngorsaaqqinnermut pilersaarutip suliarineqarnissaanut atorneqassapput paasissutissat qinnuteqartup peqqissutsikkut atugarisaanut, ilinniagaqarsimaneranut, inuussutissarsiutigisimasaanut inooqataanermilu atugarisaanut tunngasut.

*Imm. 2.* Piginnaanngorsaaqqinnermut pilersaarut kommunip oqartussaasoqarfiit assigiinngitsunik suliallit suleqatigiiffiannut saqqummiussinnaavaa.

**§ 3.** Piginnaanngorsaaqqinnermut pilersaarut neqeroorutininik imaqassaaq

- 1) ilinniagaqarnissamut imaluunniit qaffasinnerusumik ilinniagaqarnissamut ikiorsiissamik, imaluunniit
- 2) allamik suliaqalernissamut suliamut allamut ilinniarnissamik, imaluunniit
- 3) sungiusarneqarnissamik innarluutigisimasinnaasat kingunerisaannut imaluunniit ajoqusernerit kingunerisaannut ikiuutaasinnaasumik.

*Imm. 2.* Piginnaanngorsaaqqinnermut pilersaarutip piginnaanngorsaaqqinnerup siunertaa

paasinarsisissavaa.

*Imm. 3.* Piginnaanngorsaaqqinnermut pilersaarutip naammassinissaanut piumasaqaatit ataasiakkaanut tamanulluunniit tunngasut allanngorpata kommunip pilersaarut iluarsaatissavaa.

**§ 4.** Piginnaanngorsaaqqittoq eqeersimaarluni piginnaanngorsaaqqinnermut pilersaarutip naammassinissaanut peqataassaaq, tamanna tamatumaluunniit ilaa najugaqarfigisap avataani pissangaluarpalluunniit, imaassimangippat tamanna inuttut ilaqutariittulluunniit atugarisanut tunngatillugu qularnanngitsumik naleqqutinngitsoq.

*Imm. 2.* Najugaqarfigisap imm. 1-imi taaneqartoq tassaavoq sumiiffik piginnaanngorsaaqqinnermut pilersaarutip suliarineqarnerani piginnaanngorsaaqqittup najugaqarfigisaa imaluunniit piginnaanngorsaaqqittup nunassiffissamisut toqqagaa.

#### *Piginnaanngorsaaqqinnermi aningaasatigut ikiorsiissutit*

**§ 5.** Kommuni piginnaanngorsaaqqinnermi aningaasatigut ikiorsiissaaq piginnaanngorsaaqqinnermut pilersaarut malillugu piginnaanngorsaaqqittup aallartinneraniit tunniussisassallunilu piginnaanngorsaaqqittup piginnaanngorsaaqqinnermut pilersaarummik malinninnerata nalaani.

*Imm. 2.* Piginnaanngorsaaqqittoq piginnaanngorsaaqqinnermut pilersaarummik malinnittutut isigineqassaaq piginnaanngorsaaqqinnermut pilersaarutip anguniagaanut imarisaanullu akornutaanngitsumik piginnaanngorsaaqqinnerup ingerlanera sivikitsumik unitsinneqartarsimagaluarpalluunniit.

*Imm. 3.* Piginnaanngorsaaqqinnermut ikiorsiissutit kommunip unitsissavai piginnaanngorsaaqqinneq naammassippat imaluunniit siusinnerusukkut, piginnaanngorsaaqqinneq taamaatinneqarpat

**§ 6.** Piginnaanngorsaaqqinnermi aningaasatigut ikiorsiissutit, S.I.K.-p aamma Naalakkersuisut akornanni isumaqatigiissutit malillugit sulisartup ilinniagaqarsimanngitsup tiimimusiaasa minnerpaat 70%-iisut annertutigisunik tiimimut aalajangersimasumik annertussusilerlugit tunniunneqassapput.

*Imm. 2.* Ikiorsiissutit naatsorsorneqassapput tiimit piginnaanngorsaaqqittup piginnaanngorsaaqqinnermi peqataaffigisaasa amerlassusiat tunngavigalugu, annerpaamillu sap. akunneranut 40 tiimit tunngavigalugit. Piginnaanngorsaaqqinnermi aningaasatigut ikiorsiissutit ullut 14-ikkaarlugit kingumoortumik tunniunneqassapput.

*Imm. 3.* Imm. 1 naapertorlugu tiimimut akit annertussusaat ukiut tamaasa 1. april aamma 1. oktober aalajangersarneqartassapput. Naalakkersuisut aamma SIK-p akornanni isumaqatigiissut allannguuteqartillugu tiimimut akit annertussusaat Naalakkersuisunit sapinngisamik piaartumik tamanut saqqummiunneqassapput.

**§ 7.** § 6 tunngavigalugu piginnaanngorsaaqqinnermut aningaasatigut ikiorsiissutit kommunip appartissavai

1) inuutissarsiutigalugu sulinnermi imaluunniit namminersorluni ingerlatsinnermi ukiumut isertitanik kr. 28.000,00-iniit qummut sinneruttunik, imaluunniit

2) sillimmasiismanermit imaluunniit soraarnerussutisiassanut aaqquussusinnermit ingerlaavartumik tigusartakkanik, ilanngullugit Sulisilluni ajoqusernerit kingunerisassaannut sillimmasiinissamik inatsisip Kalaallit Nunaanni atortuulersinneqarnissaanik peqqussut malillugu inuussutissarsiorsinnaassutsimik annasaqarnermut taarsiissutinit ingerlaavartumik tigusartakkat.

*Imm. 2.* Taamaattoq isertitat imm. 1-imi nr. 2-mi taaneqartut aatsaat ilanngaataassapput inuussutissarsiutigalugu sulinnermi aamma namminersorluni ingerlatsinnermi isertitat piginnaanngorsaaqqinnermut aningaasatigut ikiorsiissutit ilanngullugit katillugit

piginnaanngorsaaqqinnerup siorna piginnaanngorsaaqqittup sulinikkut isertitarisimasaanit amerlaneruppata.

*Imm. 3.* Isertitat allat pissutigalugit piginnaanngorsaaqqinnermut aningaasatigut ikiorsiissutit appartinneqassanngillat.

**§ 8.** Ataasiaannartumik aningaasartuutitut pisariaqartunut peqqussummi § 13, imm. 2 naapertorlugu kommuni aningaasartuutigisinnaasaattut isigineqarput pikkorissarnermut akiliut, atuakkat, immikkut suliffimmik aaqqissuussineq.

#### *Eqaannerusumik suliffeqarneq*

**§ 9.** Eqaannerusumik suliffeqarnissamik kommuni neqerooruteqarsimappat akissarsiat sulinermilu atugassarititat allat, ilanngullugu piffissaq suliffissaq, suliaqarfimmut isumaqatigiissutit atuuttut aallaavigalugit aalajangersarneqassapput. Suliaqarfinni isumaqatigiissuteqarfiunngitsuni aallaavigineqassapput suliaqarfiit nallersuunneqarsinnaasut.

*Imm. 2.* Piffissaq tamakkerlugu eqaannerusumik suliffeqarnissamik kommuni neqerooruteqartussaataaavoq, atorfeqartup piffissap ilaannaani atorfeqartitaanissani piumanerunngippagu.

#### *Atortuulerfia*

**§ 10.** Nalunaarut manna ulloq 1. januar 2002 atortuulerpoq.

*Namminersornerullutik Oqartussat, ulloq 13. december 2001*

Ole Dorph

/

Martha S. Abelsen

**Namminersorlutik Oqartussat**

Imaneq 4

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat  
Naalakkersuisut